

## Pengalaman Toleransi Beragama Belia Pelbagai Etnik

*(Religious Tolerance Experience Among Multiethnic Youth)*

Khadijah Muda<sup>a,\*</sup>, Khairul Anwar Mastor<sup>a</sup>, Fazilah Idris<sup>b</sup>.

<sup>a</sup> Institut Islam Hadhari, Universiti Kebangsaan Malaysia

<sup>b</sup> Pusat Citra Universiti, Universiti Kebangsaan Malaysia

\*Corresponding author: [kay\\_yutaka@yahoo.com](mailto:kay_yutaka@yahoo.com)

---

### Article history

Received: 2017-04-13

Received in revised form: 2017-07-12

Accepted: 2017-07-12

### Abstrak

Artikel ini membentangkan tentang pengalaman belia terhadap toleransi beragama di Malaysia. Sampel kajian terdiri daripada 500 orang responden yang berusia antara 15 hingga 24 tahun. Pemilihan sampel dilakukan secara rawak berstrata iaitu tiga kaum utama dipilih dari lima buah negeri. Soal selidik toleransi sosio agama Ahmad Tarmizi (2010) digunakan sebagai instrumen kajian. Data dianalisis menggunakan perisian SPSS 22.0 secara deskriptif. Hasil kajian menunjukkan bahawa pengalaman toleransi agama responden adalah pada tahap yang sederhana iaitu kerap dilayan baik oleh mereka yang berbeza agama dan kadang-kadang menerima jemputan untuk majlis kahwin, rumah terbuka dan diberitahu jika ada kematian oleh kenalan yang berbeza agama. Ini menunjukkan bahawa pengalaman responden terhadap toleransi agama adalah pada tahap yang baik dan kebanyakan daripada mereka hidup dalam masyarakat yang bertoleransi.

*Kata kunci:* Pengalaman; Belia; Malaysia dan Toleransi agama

### Abstract

This article presents youth experience towards religious tolerance in Malaysia. The sample consists of 500 respondents aged between 15 and 24 years old. The selection is done by a stratified-random sampling of three main races selected from five different states. The questionnaire of socio-religious tolerance by Ahmad Tarmizi (2010) is used as research instrument. The data are analysed descriptively using SPSS 22.0. The findings show that the experience of respondents' religious tolerance is at a medium level, which is they often well-served by different religious people and sometimes receiving invitations for weddings, open houses and being told if there is death by different religious contacts. This indicates that the respondents' experience of religious tolerance is at a good level and most of them live in a tolerant society.

*Keywords:* Experience; Youth; Malaysia and Religious tolerance

## **1.0 PENGENALAN**

Toleransi merupakan satu tindakan yang dilakukan tanpa paksaan dan dipamerkan melalui sikap, pendapat, tingkah laku dan kepercayaan (Adeney 1926; Ferrar 1976). Toleransi beragama adalah nilai saling menghormati antara penganut-penganut agama lain dan sikap yang membenarkan dan menerima perbezaan agama untuk diamalkan dalam masyarakat majmuk tanpa diskriminasi dan prasangka (Roni Ismail, 2012; Ahmad Tarmizi et al, 2013). Menurut definisi ini, penyelidik merumuskan bahawa toleransi beragama ialah nilai dan sikap menghormati kepercayaan dan amalan agama-agama lain yang tidak bercanggah dengan norma-norma masyarakat. Walau bagaimanapun, ini tidak bermakna bahawa setiap orang perlu untuk mengakui kebenaran doktrin dan falsafah yang terkandung dalam ajaran agama-agama lain (Khadijah & Mohd Herzali, 2008).

Toleransi beragama adalah satu topik yang universal yang sering diperkatakan, namun masih banyak yang perlu dibincangkan bagi mewujudkan dunia yang harmoni (Ahmad Tarmizi & Sarjit S. Gill, 2012; Mohd Roslan, 2011). Ulasan lanjut mengenai kajian akademik mendapati bahawa banyak penyelidikan mengenai hubungan toleransi agama dalam masyarakat telah dilakukan. Walau bagaimana pun, kajian mengenai pengalaman terhadap toleransi beragama secara kuantitatif masih kurang diterbitkan. Justeru, penyelidik ingin memfokuskan perbincangan artikel ini kepada pengalaman toleransi beragama belia pelbagai etnik di Malaysia.

## **2.0 TOLERANSI BERAGAMA DI MALAYSIA**

Toleransi beragama adalah asas kepada keharmonian negara dan ketiadaan toleransi beragama berupaya menjadi faktor penyebab perpecahan di kalangan masyarakat yang pelbagai. Pelbagai isu yang melibatkan agama telah mencetuskan kemarahan rakyat Malaysia. Antara isu-isu adalah penggunaan kalimah Allah oleh penganut Kristian (Mohd Roslan, 2011), isu pasangan remaja, Alvin dan Vivian yang menghina agama Islam (Karmini, 2013), isu kepala babi di sebuah masjid di Kuala Lumpur dan isu perarakan kepala lembu di Selangor (Rahimin Affandi et.al, 2011).

Konflik antara penganut agama yang berbeza boleh dikurangkan dengan meningkatkan tahap toleransi antara agama. Walau bagaimanapun, faktor-faktor yang menyebabkan kurangnya toleransi antara agama perlu dikenal pasti terlebih dahulu. Mohd Roslan (2011) mencadangkan bahawa setiap penganut agama tidak boleh menyentuh isu-isu yang sensitif. Mana-mana isu yang melibatkan sensitiviti agama yang timbul perlu diselesaikan secara rasional dan diplomasi. Kurangnya sikap toleransi beragama juga berpunca daripada kurangnya sikap menghormati hak orang Islam oleh penganut agama lain sebagaimana yang ditetapkan dalam Perkara 11 Perlembagaan Persekutuan Malaysia (Khadijah & Mohd Herzali, 2008). Akhir sekali, tahap kefahaman masyarakat terhadap agama lain juga merupakan antara faktor yang membawa kepada kurangnya toleransi antara agama (Nur Farhana & Khadijah, 2013).

Dalam usaha untuk mengatasi masalah toleransi antara agama, Khadijah dan Mohd Herzali (2008) dan Rahimin Affandi et.al (2011) telah mencadangkan dialog antara agama sebagai medium untuk mewujudkan persefahaman antara penganut pelbagai agama. Dialog itu bukan semata-mata dilakukan di peringkat institusi pendidikan tinggi atau di kalangan pendakwah sahaja, tetapi ia perlu lebih menyeluruh kepada orang ramai daripada semua peringkat umur dan latar belakang.

Dalam mewujudkan masyarakat bertoleransi tinggi, terdapat beberapa cabaran yang telah dikaji oleh Nur Farhana dan Khadijah (2013). Cabaran pertama adalah hak antara orang Islam dan bukan Islam masih tidak jelas kerana terdapat konflik dan pertindihan antara undang-undang syariah dan sivil. Cabaran kedua adalah kurangnya penghargaan orang bukan Islam kepada Islam seperti yang ditetapkan oleh perlembagaan Malaysia. Manakala cabaran ketiga pula adalah faktor dalaman agama seperti yang digambarkan oleh Jaffary (2003) iaitu toleransi beragama tidak dapat dijalankan di Malaysia kerana prasangka Melayu terhadap penganut agama-agama selain Islam. Akhir sekali, cabaran yang paling berbahaya adalah kemunculan para pendakwah pluralis yang mengambil peluang untuk memperkenalkan pemikiran pluralisme agama sebagai satu pendekatan untuk toleransi agama. Malah, pluralisme agama menggalakkan kesaksamaan agama yang mengancam keharmonian agama dalam masyarakat. Sebagai contoh isu penggunaan kalimah Allah oleh penganut bukan Islam yang mampu mengelirukan umat Islam di Malaysia.

### **3.0 PENGALAMAN TOLERANSI BERAGAMA**

Malaysia telah mencatatkan beberapa peristiwa yang menunjukkan pengalamannya dalam mendepani toleransi antara sosio agama sebagaimana yang telah ditulis oleh Ahmad Tarmizi Talib dan Sarjit S. Gill (2012). Antara bukti yang menunjukkan masyarakat Malaysia bersikap toleransi adalah kewujudan amalan rumah terbuka bagi perayaan-perayaan utama yang diamalkan oleh kaum-kaum utama (Wan Azizah Wan Ismail 2001) dan kewujudan dua puluh kuil di Kelantan walaupun Buddha merupakan komuniti minoriti (Mohamed Yusoff Ismail 2006). Bagi senario yang menunjukkan sikap tidak bertoleransi dalam masyarakat Malaysia adalah sebagaimana ucapan Perdana Menteri Malaysia, Abdullah Ahmad Badawi pada 7 Disember 2006 yang menyatakan bahawa hubungan kaum di Malaysia adalah ‘rapuh’. Hubungan kaum secara tidak langsung berkait rapat dengan hubungan antara agama. Selain itu, kes Azlina Jailani atau Lina Joy yang menggemparkan bukan sahaja seluruh Malaysia malah dunia pada tahun 2006 mengenai pertukaran agamanya dari Islam kepada Kristian dan ingin menukar nama dan membuang perkataan ‘Islam’ pada kad pengenalan dirinya. Luahan rasa dan pendapat keluarga, ahli politik, pemimpin dan masyarakat sekeliling mengenai kes ini turut dibukukan oleh Tan dan Lee (2008). Kes yang hampir sama turut berulang lagi pada November 2006 yang mengundang ketegangan antara agama di Malaysia iaitu Rayyapan seorang yang berbangsa India yang telah memeluk agama Islam pada tahun 1990 dan telah berkahwin dengan seorang wanita Islam. Pada 29 November 2006, beliau meninggal dunia dan mayatnya dituntut oleh bekas isterinya, Mary yang beragama Kristian dan ingin menguburkan bekas suaminya dengan amalan pengebumian Kristian. Walau bagaimanapun, Majlis Agama Islam Selangor (MAIS) mendakwa mengikut rekod mereka Rayyapan adalah penganut agama Islam dan harus dikebumikan dengan amalan pengebumian Islam.

Ahmad Tarmizi Talib (2010; 2013) turut mengkaji pengalaman responden terhadap toleransi agama menggunakan pendekatan kuantitatif. Hasil penyelidikan beliau mendapati bahawa tahap pengalaman responden adalah sederhana. Hasil kajian adalah konsisten pada tahun 2010 dan 2013 walaupun responden yang terlibat pada tahun 2010 hanyalah negeri Selangor dan Kuala Lumpur. Manakala pada tahun 2013, negeri yang terlibat adalah Pulau Pinang, Kelantan, Terengganu, Kedah dan Selangor. Jika dilihat daripada lima negeri yang terlibat pada tahun 2013 ini, Pulau Pinang majoritinya pada tahap yang rendah dan negeri-negeri lain berada pada tahap yang sederhana. Jika

dilihat dari latar belakang agama, kesemua penganut agama Islam, Kristian, Hindu dan Buddha mempunyai pengalaman toleransi agama pada tahap yang sederhana.

Penyelidik dapat menyimpulkan bahawa pengalaman merupakan antara konstruk yang penting dalam mengkaji tingkahlaku manusia. Ini kerana, tingkahlaku seseorang kebiasaannya berdasarkan kepada pengalaman yang telah dilalui. Sebagai contoh mudah seorang pekerja muslim yang tidak dibenarkan menutup aurat pada waktu bekerja akan menyebabkan pekerja berkenaan lebih berhati-hati untuk memohon pekerjaan di bawah majikan yang berlainan agama. Pengalaman merupakan sesuatu peristiwa, keadaan dan pengetahuan yang pernah dilalui oleh diri sendiri atau orang sekeliling yang boleh mempengaruhi tindak tanduk seseorang. Pengalaman toleransi agama yang akan dikaji dalam kajian ini adalah pengalaman toleransi agama belia bersama kenalan atau jiran yang berbeza agama. Toleransi agama yang menjadi fokus adalah dari segi layanan baik dan jemputan jika ada majlis kenduri dan memaklumkan jika berlakunya sebarang kematian oleh jiran atau kenalan yang berbeza agama.

#### **4.0 METODOLOGI**

Kajian ini bertujuan untuk mengkaji pengalaman toleransi beragama dalam kalangan anak muda Melayu, Cina dan India di Malaysia. Sampel kajian terdiri daripada 500 orang belia pelbagai kaum di Selangor, Perak, Johor, Melaka dan Negeri Sembilan yang berusia antara 15 hingga 24 tahun. Golongan belia dipilih kerana mereka merupakan pelapis yang akan meneraju negara ini di masa akan datang. Berdasarkan taburan penduduk dan ciri-ciri asas demografi (Jabatan Perangkaan Malaysia, 2010), peratusan orang Melayu, Cina dan India di Selangor masing-masing 55.8%, 28.6% dan 13.5%. Oleh itu, persampelan berstrata dipilih untuk kajian ini dengan nisbah 5: 3: 2 bagi belia Melayu, Cina dan India. Persampelan ini lebih sesuai digunakan kerana ia lebih mewakili responden dan menjimatkan masa (Newman & MvNeil, 1998). Instrumen yang digunakan dalam kajian ini telah dibangunkan oleh Ahmad Tarmizi (2010), iaitu soal selidik toleransi sosio-agama. Data bagi kajian ini dianalisis menggunakan perisian SPSS 22.0 secara deskriptif.

#### **5.0 KEPUTUSAN DAN PERBINCANGAN**

Hasil kajian ini akan menentukan demografi dan tahap pengalaman toleransi beragama dalam kalangan responden.

Latar belakang responden dalam kajian ini adalah majoritinya beragama Islam dan berumur antara 18 hingga 21 tahun. Jantina bagi lelaki dan perempuan adalah sama. Kebanyakan responden mempunyai tahap pendidikan di peringkat universiti, diikuti peringkat sekolah menengah. Kebanyakan responden juga berada dalam kawasan kediaman yang mempunyai kejiwaan yang bercampur dengan etnik-etnik lain. Sebagai contoh etnik Melayu mempunyai jiran yang berbangsa Cina dan India. Item-item toleransi sosio-agama yang dibangunkan oleh Ahmad Tarmizi (2010) ini sesuai digunakan dalam kajian ini kerana responden kajian terdiri daripada belia-belie yang berada dalam kawasan yang padat dengan etnik-etnik lain sama ada di tempat belajar atau di tempat tinggal.

**Jadual 1: Demografi responden**

Faktor demografi		Kekerapan	Peratus (%)
Agama	Islam	253	50.6
	Buddha	97	19.4
	Hindu	94	18.8
	Kristian	45	9.0
	Sikh	1	0.2
	Tao/Konfusius	6	1.2
	Lain-lain	4	0.8
Etnik	Melayu	250	50.0
	Cina	150	30.0
	India	100	20.0
Umur	15-17	120	24.0
	18-21	277	55.4
	22-24	103	20.6
Jantina	Lelaki	250	50.0
	Perempuan	250	50.0
Pendidikan Tertinggi	Universiti	201	40.2
	Kolej/Maktab	115	23.0
	Sekolah Menengah	178	35.6
	Lain-lain (pondok dan STPM)	6	1.2
Jenis Kaum di Tempat Kediaman	Kaum sendiri sahaja	100	20.0
	Campuran	375	75.0
	Dominasi Kaum Lain	25	5.0

**Jadual 2: Item bagi pengalaman toleransi beragama**

Item	F (%)					Min	Tahap
	Tidak pernah	Jarang	Kadang-kadang	Kerap	Sangat kerap		
1) Anda dilayan dengan baik oleh kenalan yang berbeza agama.	14 (2.8)	38 (7.6)	116 (23.2)	181 (36.2)	151 (30.2)	3.834	Tinggi
2) Anda dilayan dengan baik oleh jiran yang berbeza agama	20 (4.0)	37 (7.4)	118 (23.6)	195 (39.0)	130 (26.0)	3.756	Tinggi
3) Anda menerima undangan untuk menghadiri majlis rumah terbuka perayaan keagamaan yang dianjurkan oleh kenalan yang berbeza agama.	57 (11.4)	70 (14.0)	140 (28.0)	130 (26.0)	103 (20.6)	3.304	Sederhana
4) Anda menerima undangan untuk menghadiri majlis perkahwinan yang dianjurkan oleh kenalan yang berbeza agama.	68 (13.6)	88 (17.6)	132 (26.4)	129 (25.8)	83 (16.6)	3.142	Sederhana
5) Anda dimaklumkan mengenai kematian kenalan yang berbeza agama.	101 (20.2)	91 (18.2)	119 (23.8)	108 (21.6)	81 (16.2)	2.954	Sederhana

Menurut Schmitt (1999), pengalaman merupakan peristiwa-peristiwa peribadi yang berlaku sebagai tindakbalas kepada beberapa simulasi dan melibatkan seluruh kehidupan. Pengalaman

terhadap toleransi agama merupakan peristiwa yang pernah dilalui responden yang melibatkan toleransi antara penganut agama lain.

Tahap pengalaman responden terhadap toleransi beragama secara keseluruhannya iaitu purata min bagi kelima-lima item berada pada tahap sederhana. Hasil daripada keputusan analisis kajian yang terdiri daripada lima item dalam menilai pengalaman terhadap toleransi agama belia menunjukkan bahawa belia bergaul dengan baik dengan kenalan dan jiran tetangga yang berbeza agama. Belia-belia dalam kajian ini juga biasa iaitu lebih 70 peratus daripada kesemua responden pernah menerima jemputan majlis perkahwinan dan majlis perayaan penganut agama lain. Begitu juga dengan kematian kenalan yang berbeza agama. Belia kajian ini turut dimaklumkan jika berlakunya kematian kenalan yang berbeza agama. Ini menunjukkan wujudnya pergaulan dan interaksi yang baik antara belia dengan penganut lain yang berbeza agama. Walau bagaimanapun, jemputan perkahwinan dan majlis rumah terbuka serta kematian bukanlah sesuatu yang sering terjadi. Maka, responden tidak akan dijemput atau diberitahu secara kerap.

Amalan toleransi beragama perlu dikekalkan dan dipertingkatkan lagi agar nilai dan amalan ini tidak hilang ditelan zaman. Nilai dan amalan toleransi agama penting bagi mengekalkan keharmonian negara yang mempunyai pelbagai kaum dan agama seperti di negara ini. Jika toleransi agama tidak dapat dikekalkan lagi, maka negara bakal menyaksikan perpecahan dan pergaduhan dalam masyarakat di mana masing-masing tidak boleh bertolak ansur dengan penganut agama lain walaupun dalam perkara yang remeh. Hal ini akan mendatangkan kerugian kepada negara dan menjadi punca kepada keruntuhan dari pelbagai sudut seperti keruntuhan ekonomi, politik, sosial dan sebagainya.

Bagi menambahbaik nilai dan amalan toleransi agama yang ada, masyarakat perlu didedahkan dengan interaksi antara pelbagai agama dan kaum bermula dari alam persekolahan. Sekolah vernakular wajar dikurangkan agar tidak timbul semangat perkauman yang tinggi dan masyarakat saling berinteraksi. Satu bahasa wajar digagaskan agar semangat kenegaraan dapat mengatasi semangat perkauman.

## 6.0 RUMUSAN

Pengalaman toleransi beragama yang baik dengan penganut agama lain merupakan elemen penting dalam mewujudkan masyarakat yang bersikap toleransi dalam masyarakat pelbagai agama seperti di Malaysia. Pengalaman merupakan peristiwa yang berada dalam ingatan setiap orang yang akan memandu kepada tingkahlaku mereka kepada situasi yang akan dilalui pada masa akan datang. Pengalaman berbeza bagi setiap orang dan merupakan sesuatu yang berharga yang tidak dapat diulangi lagi. Dalam konteks toleransi beragama ini, pengalaman bertoleransi dengan penganut agama lain yang telah dilalui akan memberi kesan kepada diri belia untuk bertingklaku dengan penganut agama lain. Setiap belia perlu dipupuk agar menghormati penganut agama lain supaya setiap orang dapat menjalankan cara hidup agama masing-masing dalam suasana yang harmoni.

### Penghargaan

Artikel ini merupakan hasil penyelidikan di bawah Geran *Fundamental Research Grant Scheme* (FRGS). Tajuk penyelidikan: Pembentukan model toleransi agama dan kesan terhadap hubungan etnik dalam konteks 1Malaysia. Kod projek: FRGS/1/2012/STWN09/UKM/02/01(SS)

## Rujukan

- Ahmad Tarmizi Talib. (2010). *Socio-Religious Tolerance: Malaysia as a Case Study*. PhD, Lampeter: University of Wales Lampeter.
- Ahmad Tarmizi Talib. (2013). Kajian Toleransi Sosio-Agama di Semenanjung Malaysia. *Jurnal Perpaduan IKLIN*. 138-170.
- Ahmad Tarmizi Talib & Sarjit S. Gill. (2012). Socio-religious Tolerance: Exploring the Malaysian Experience. *Global Journal of Human Social Science*, 12(8), 49 – 54.
- Ahmad Tarmizi Talib, Sarjit S. Gill, Zaid Ahmad, B. Jayum A. Jawan & Nur Ayuni Mohd Isa. (2013). Toleransi Sosio-Agama di Sabah dan Sarawak. *Malaysia Journal of Youth Studies*. 9, 83-90.
- Adeney, W. F. (1926). *Toleration*. In J. Hastings (Ed.), *Encyclopedia of Religion and Ethics*. (Vol.12). Edinburgh: T & T Clark.
- Ferrar, J. W. (1976). The Dimensions of Tolerance. *The Pacific Sociological Review*, 19(1), 63 -81.
- Jabatan Perangkaan Malaysia (2011). *Taburan Penduduk dan Ciri-ciri Asas Demografi 2010*. Malaysia: Jabatan Perangkaan Malaysia.
- Jaffary Awang. (2003). Toleransi agama dan perpaduan kaum, pandangan intelek: satu observasi ringkas. dlm. *Agama dan perpaduan kaum di Malaysia*. Selangor: Penerbit Universiti Kebangsaan Malaysia.
- Karmini, A. N. (2013). Framing Moral Panic: A Comparative Analysis of the Alvin & Vivien Sex Blog Coverage by The Star and MalaysiaKini. Artikel ini dibentangkan di persidangan Asian Media Information and Communication, 2013.
- Khadijah Mohd Khambali @ Hambali & Mohd Herzali Mohd Haled. (2008). Toleransi Beragama Dan Amalannya di malaysia: Rujukan kepada Artikel 11 Perlembagaan Persekutuan Malaysia. *Jurnal Usuluddin*, 27, 81–92
- Mohd Roslan Mohd Nor. (2011). Religious Tolerance in Malaysia: An Overview. *Middle East Journal of Scientific Research*, 9(1), 23–27.
- Mohamed Yusoff Ismail. (2006). Buddhism in a Muslim state: Theravada practices and religious life in Kelantan. *Jurnal E-Bangi*, 1(1), 1–20. doi:10.1111/j.1478-1913.2010.01323.x.
- Newman, I. & McNeil, K. (1998). *Conducting Survey Research in the Social Sciences*. Maryland: University Press of America.
- Nur Farhana Abdul Rahman & Khadijah Mohd Khambali@Hambali. (2013). Religious Tolerance in Malaysia: Problems and Challenges. *International Journal of Islamic Thought*, 3, 81-91.
- Rahimin Affandi Abd. Rahim, Mohd Anuar Ramli, Paizah Ismail & Nor hayati Mohd Dahlal. (2011). Dialog antara agama: realiti dan prospek di Malaysia. *Kajian Malaysia*, 29(2), 91–110.
- Roni Ismail. (2012). Konsep toleransi dalam psikologi agama (tinjauan kematangan beragama). 8(1), 1-12.
- Schmitt, B. H. (1999). *Experiential Marketing: How To Get Customer to Sense, Feel, Think, Act, Relate to Your Company and Brands*. New York: The Free Press.

- Tan, N., & Lee, J. (Eds.). (2008). *Religion Under Siege? Lina Joy, the Islamic State and Freedom of Faith. Religion Under Siege? Lina Joy, the Islamic State and Freedom of Faith.* Kuala Lumpur: Kinibooks. Retrieved from [www.Malaysiakini.com](http://www.Malaysiakini.com)
- Wan Azizah Wan Ismail. (2001). Building Effective Ethical-moral Co-operation in a Pluralist Universe. In Camilleri Joseph A (Ed.), *Religion and Culture in Asia Pacific: Violence or Healing?* Melbourne: Pax Christi Australia.